

Ísland neðansjárvar

(Submarine Iceland).

Góð afmælisgjöf væri það á þúsund ára hátíðinni, ef alþjóðasamþykki væri gefið til þess, að Íslendingar réðu yfir grunnsævinu kringum landið, út að 200 metra dýptarlínu. Hvað sem lög um liður, þá mælir öll sanngirni með því, að svo sé. Grunnið kringum landið er hluti af landinu sjálfu. Svo langt náði áður landið út, sem grunnið nú. Ströndin var þar sem nú er 200 metra línun, en þar út af bráðdýpkar, eins og kunnugt er. Í doktorsritgerð minni um jarðfræði Íslands (Om Islands Geologi) hefi ég — og að visu í nokkrum landvinningahug — nefnt grunn þetta: Det submar-

ine Iceland, og minar rannsóknir hafa leitt í ljós, að það var milljónum ára seinna en haldið hafði verið, sem landið náð svona langt út.

Hvert skip, sem veiðar stundar á þessu íslenska yfirráðsvæði, ætti svo að gjalda eitthvað fyrir að fá að nota fiskimiðin. Mundi skipin muna það litlu hvert um sig, en ríkissjóð miklu, þegar saman kæmi. — Varla er að efa, að veiðar útlendinga draga nokkuð úr afla Íslendinga sjálfra, svo að sanngjart er að ætlast til leigu. Um það kann ég vitanlega ekki að dæma, hve miklir lagalegir (og enn aðrir) örðugleikar mundu verða á að koma þessu máli fram, en hitt get ég sagt með vissu, að allt mundi verða auðveldara, einnig í þeim efnum, þegar íslenskri heimsfræði yrði eitthvað til muna ágengt, og þar með auðskildara miklu en áður, hvíllka þýðingu hin litla íslenska þjóð getur fengið fyrir allt mannkyn.

3.—4. júní.

Helgi Pjeturss.

Útgerð júní 1929.